

浩
端
愍
公
詩
集
吟



叢書集成

初編

主編者
王雲五

商務印書館發行



浩 氣 吟



3 0646 3309 6

瞿 式 紹 撰

本館據借月山房
彙鈔本排印初編
各叢書僅有此本

083

112

2:2285

浩氣吟 原序

浩氣吟原序

嗚呼。九域飄迴。三精霧塞。寢廟之玉衣晨舉。昭陵之石馬宵馳。抉日月于南郊。畫乾坤于地戶。崎嶇庸蜀。實仗老臣。收拾管篋。豈惟一旅。夫何桂山雲擾。灘水波翻。四郊斷螳子之援。三都成魚爛之潰。謀人之軍師國邑。我則死之下。可見天地祖宗事已畢矣。于是慷慨誓死。暇豫賦詩。嚼張巡之齒牙。曼聲長咏。握魯公之拳爪。運筆橫飛。偉彼義人。慨然赴難。拘調同日。洵芝焚而蕙歎。合口唱酬。譬金春而玉應。遺言付囑。副墨流傳。壁漫窗塗。星緯芒角于字裏。墨陳紙故。雷風發作于行間。亦曰念哉。吁其悲矣。昔者睢陽苦賊。更樓起橫笛之吹。越石重圍。長嘯發扶風之咏。以至空坑被執。吟嘯之集頻煩。柴市歸全。正氣之歌激越。其人爲宇宙之真元氣。其詩則今古之大文章。吐詞而神鬼宵驚。搖筆而星河如覆。況復留連警蹕。沈痛封提。死不忘君。沒而猶視。人言天荒地老。斯恨何窮。我謂劫盡灰飛。是詩不沫。伊余晚晚。遷此瘴瘴。燈火青熒。須眉如見。窗櫺寂歷。歎噫有聞。庸表汗青。長留血碧。嗚呼。八百三十紀之算。鴻朗莊嚴。一千一百字之章。鼎鍾銘勒。豈徒託諸詩史。終有攷于斯文。

51867

浩氣吟

庚寅年十一月初五日聞警。諸將棄城而去。城亡與亡。余自誓一死。別山張司馬明 瞿式耜。自任東來城。與綠軒。死。被刑不屈。縶月幽囚。漫賦數章。以明厥志。別山從而和之。

藉艸為茵枕。由眠。更長寂寂夜如年。蘇卿絳節唯思漢。信國丹心止告天。九死如飴遑惜苦。三生有石只隨緣。殘燈一室羣魔繞。寧識孤臣夢坦然。

其二

已揅薄命付危疆。生死關頭豈待商。二祖江山人盡擲。四年精血我偏傷。羞將顏面尋吾主。剩取忠魂落異鄉。不有江陵真鐵漢。腐儒誰為剖心腸。

其三

正襟危坐待天光。兩鬢依然勁似霜。願作須臾階下鬼。何妨慷慨殿中狂。見定南於靖江殿。憑加榜辱神無變。捉與衣冠語益莊。莫笑老夫輕一死。汗青留取姓名香。

其四

年年索賦養邊臣。曾見登陣有一人。上爵滿門皆紫綬。荒邨無處不青燐。僅存皮骨民堪畏。樂爾妻孥學國

已貧。試問怡堂今在否。孤存留守自捐身。

其五

拘幽土室豈偷生。求死無門慮轉清。勸勉煩君多苦語。彭王二公時來相慰癡愚歎我太無情。高歌每羨騎箕句。灑
泪偏來滴雨聲。四大久摻同泡影。英魂到底護皇明。

其六

嚴疆數載盡臣心。坐看神州已陸沉。天命豈因人事改。孫謀爭及祖功深。二陵風雨時來繞。歷聖衣冠何
處尋。衰病餘生刀俎寄。還欣短髮尚蕭森。

其七

年逾六十復奚求。多難憑經渾不愁。劫運千年彈指到。綱常萬古一身留。欲堅道力憑魔力。何事俘囚學
楚囚。了却人間生死業。黃冠莫擬故鄉遊。

兵部侍郎兼翰林院學士門生張同敞和

稜稜瘦骨不成眠。祖德君恩四十年。腰膝尚存堪作鬼。死生有數肯呼天。崇山欲附文山烈。蘇武休思
漢武緣。蹈鑊撩衣談笑裏。何須血泪更潸然。

其二

連陰半月日無光。草篋終宵薄似霜。白刃臨頭唯一笑。青天在上任人狂。但留衰鬢酬周孔。不羨餘生

奉老莊有骨可拋名可斷。小樓夜夜汗青香。

其三

四載危疆一個臣。城亡待死愧今人。將軍不肯留犀甲。風雨唯聞嘯碧磷。九廟英靈應不改。三邊財賦爲誰貧。傷心宵旰當年志。寸磔應叢九死身。

其四

凜然大義自平生。囊底無錢魄亦清。二烈雙忠原有數。先曾祖居正。諱文忠。先祖敏修。諱孝烈。先叔祖克修。諱起烈。九朝七世豈忘情。亡家骨肉皆冤鬼。多難師生共哭聲。想見刀頭空一切。長宵盼不到天明。

其五

日日刀錐攢我心。豈其天意有升沉。命延一刻慚難負。論到千年慮益深。此地骨原堪朽腐。他時魂不待招尋。昨宵猶夢亡親在。醒後唯留夜雨淋。

其六

忘生翻覺死難求。甲士相環任我愁。祭酒一身同臘盡。睢陽二子共名留。已攜魂作他鄉鬼。博得人稱亡國囚。三百年來恩怨血。先皇應許得從遊。

自警

不朽稱三立。惟名貫此中。完貞方是德。砥世卽爲功。生死休言命。春秋祇教忠。失身千古恨。大擔在微躬。

其二

平生美好境。此日復何求。天地一身外。江山不我留。悟因空後得。心向死邊休。領受須歡喜。參同在小樓。

其三

若論成人事。臨危止一端。聖賢原節取。世俗已驚看。死豈求名地。吾當立命觀。乾坤留此夕。魂魄也教安。

其四

佛教言生死。無過一了緣。朝聞纔是道。聖訓已居先。臨節徵完養。成仁誦昔賢。到頭方夢醒。在我不繇天。

憶聖蹟

鑿輿播越五經冬。風雨飄搖半避烽。萬竅總無千騎擁。三江應有百靈從。卜年未許更周歷。關國寧教盡漢封。待死孤臣難赴闕。瞻天遙祝護蒼龍。

自歎呈別山

七尺那堪斗室蟠。禪關止靜好同觀。心維漢鼎千秋痛。目極堯封萬里酸。人語嘈嘈魂裏聽。飄風烈烈夢中寒。扶輿非大身非小。留得綱常宇宙寬。

聞同事諸公俱以招至感而有述

聞道諸公已受招。網羅施處幾曾饒。平生志節徵今日。願盼衣冠戀本朝。達變恥爲文若伍。養高難許子方驕。俘臣苦憶無繇見。咫尺真同萬里遙。

閏十一月初九爲先妻生忌。因中人不能焚一紙，碩甫揚兄從鄉間禮懺，詩以謝之。夢裏音容幾度看，似憐遭難慰予安。荒村誰伴三更雨，野櫬空圍萬疊巒。香火久湮塵土積，竹梅時聽珮聲珊。生辰累子猶存臆，特與冥資結淨壇。

夜夢在一室，如家中馭娑館。先少師命余設榻而臥，余卽拂拭書几，以臥具敷其上。几旁一罌瓶，觸而墜下，余以手承之，竟不墮地，完好無恙，覺而紀之。

遺像他人得，亡親入夢看。若悲嬰禍患，仍喜肅衣冠。效死忠臣分，成名肖子難。醒來還自解，高臥報平安。

閏十一月十七日臨難口吟

從容待死與城亡，千古忠臣自主張。三百年來恩澤久，頭絲猶帶滿天香。

其二

斷臂傷睛木塞脣，猶存雙膝舊乾坤。但將一死酬今古，剩有丹心傍主臣。

別山遺藁附

留守師贈詩賦答

仗節誰云有異同，此時此難正遭逢。書生恥效荀文若，夫子堪師信國公。共看挺身當亂裏，可憐渡水入城中。願隨君死非無意，烈烈天朝賴世忠。

夢傅司馬忠烈公

抗節如公有幾人。磔殘今尙夢全身。應知同學談忠孝。決不偷生負鬼神。視死如歸懷老友。有恩未報痛孤臣。恥將丹血分青史。與爾幽冥共結鄰。

自訣

一月悲歌待此時。成仁取義有天知。衣冠不改生前制。名姓空留死後詩。破碎山河休葬骨。顛連君父未舒眉。魂兮懶指歸鄉路。直往諸陵拜舊碑。

浩氣吟附錄

臨難遺表

罪臣瞿式耜謹奏。臣本書生。未知軍旅。自永歷元年。謬膺留守之寄。拮据四載。心盡力枯。無如將悍兵驕。勦鎮諸臣。惟以家室爲念。言守言戰。多屬虛文。逼餉逼糧。日無寧晷。臣望不能彈壓。才不能駕馭。請督師而不應。求允放而不從。馴至今秋。灼知事不可爲。呼籲益力。章凡數上。而朝廷漠然置之。近十月十三日。集衆會議。搜括懸賞。方謂卽不能戰。尙可以守。忽于十一月初五之辰。開國公趙印選。傳與安塘報一紙。知嚴關諸塘。盡已掃去。當卽飛催印選等星赴子營。而印選躊躇不前。臣竊訝之。詎意其精神全注老營。止辨移營一著。午後。臣遣人再偵之。則已盡室而行。并在城衛國公胡一青。寧遠伯王永祚。綏寧伯蒲纓。武陵侯楊國棟。寧武伯馬養麟。各家老營俱去。城中竟爲一空矣。臣撫膺頓足曰。朝廷以高爵餌此輩。百姓以膏血養此輩。今遂作如此散場乎。至酉刻。督臣張同敞從江東遙訊城中光景。知城中已虛無人。止留守一人尙在。遂泐水過江。直入臣寓。臣告之曰。城存與存。城亡與亡。自丁亥三月已擗一死。吾今日得死所矣。子非留守。可以無死。盍去諸。同敞毅然正色曰。死則俱死耳。古人恥獨爲君子。君獨不容我同殉乎。卽于是夜。明燈正襟而坐。時臣之童僕散盡。止一老兵尙在身旁。夜雨淙淙。遙見城外火光燭天。滿城中寂無聲響。坐至雞唱。有守門兵入告臣曰。清兵已圍守各門矣。天漸明。臣與同敞曰。吾二人死期近矣。

辰刻。噪聲始至靖江府前。再一刻。直至臣寓。臣與同敵危坐中堂。屹不爲動。忽數騎持弓腰刀。突至臣前。執臣與同敵而去。臣語之曰。臣等坐待一夕矣。毋庸執。遂與偕行。時大雨如注。臣與同敵從泥淖中蹣跚數時。始到靖江府之後門。時清定南王孔有德已坐王府矣。靖江父子亦以守國未曾出城。業已移置別室。不加害。惟見甲仗如雲。武士如林。少之引見定南。臣等以必死之身不拜。定南亦不強。臣與同敵立而語曰。城已陷矣。惟求速死。夫復何言。定南霽色溫慰曰。吾在湖南。已知有留守在城中。吾至此。卽知有兩公不怕死而不去。吾斷不殺忠臣。何必求死。甲申闖賊之變。大清國爲先帝復仇。且祭葬成禮。固人人所當感激者。今人事如此。天意可知。臣與同敵復語定南。我今日已辦一死。其不死于兵未至之前。正以死于一室。不若死于大庭耳。定南隨遣人安置一所。臣等不薙髮亦不強。只今清兵已克平樂。陽朔等處。取梧祇早晚間。臣涕下霑襟。仰天長號曰。吾君遂至此極乎。當年擁戴一片初心。惟以國統絕繼之關繫乎一線。不揣力綿。妄舉大事。四載以來。雖未豎有寸功。庶幾保全寸土。豈知天意難窺。人謀舛錯。歲復一歲。竟至于斯。卽寸磔臣身。何足以蔽負君誤國之罪。然纍纍諸勳。躬受國恩。敵未臨城。望風逃遁。大廈傾圮。固非一木所能支也。臣灑淚握筆。具述初五至十四日。以內情形。仰瀆聖聽。心痛如割。血與淚俱。惟願皇上勿生短見。暫寬聖慮。保護宸躬。以全萬姓之生。以留一絲之緒。至于臣等罪戾。自知難逃青史。惟有堅求一死。以報皇上之隆恩。以盡臣子之職分。天地鬼神。實鑒臨之。明留守太保吏兵二部尙書中極殿大學士臨桂伯臣瞿式耜表上。



申端愍公詩集

申佳胤 著

本館據畿輔叢書
本排印初編各叢
書僅有此本

申端愍公詩集卷一

明 永年申佳允著

五言古詩

貝聖堂感賦

少讀封人編。倦焉懷遠託。今者至於斯。封人不可作。風物尙依稀。衣冠半零落。顧茲太古民。渾渾而噩噩。河北綠林秋。前年恣焚掠。登萊倒干戈。曹濮驚風鶴。余亦抱關者。夜深催繫柝。災害復相仍。彼蒼一何虐。安得封人起。呼天叩求莫。樓槍兩地清。禾黍三秋穫。道路無聾曠。春風何寥廓。一簾案牘閒。萬戶弦歌約。天下惟有道。人心自木鐸。

黃梁祠

鉅鹿樹殷腥。黃河碧濤死。蛇豕徧荒林。魚龍積斷境。縹緲叢臺月。春風照龜水。邯鄲孤堞懸。黃梁楚祠峙。馬影競夕陽。鳥聲沸嶺嶠。午移炊火新。秋合烟光紫。醉醒蕉鹿場。真幻鶯花市。天地劃然迴。榮枯率爾駛。短褐狎風塵。盜枕認原委。稽首叩仙人。吾師注夢史。

王祁連先生書薦相士

有客楚中來。叩門投雙鯉。爲誰寄書郵。云是王夫子。夫子分邯鄲。四野歌樂只。風墨髻穉中。期予天下士。

發祥扁敝廡。母節揚閭里。感此覆載恩。而敢忘沒齒。鳧飛入長安。天涯真尺咫。今春解組歸。扼腕遭讒毀。夢魂楚山遠。捧讀胡不喜。大業勸千秋。低眉欲愧死。可憐寄書人。相士莫踰此。慚余骨氣酸。握手憐相視。貧更苦贈貽。無計充行李。東郭一相招。濁酒淡於水。尺素懸齋頭。如坐春風裏。

贈建德徐君顯

有客清源來。蕭寺傾談吐。翩翩文獻家。季叔徐工部。工部涖荊州。司李遷廣武。手不持一錢。兒卒詫清苦。布素屏綺羅。脫粟絕羞脯。志不在飽溫。面目存酸腐。性復好施予。不但無所取。入嚮出偏奢。蕭然一貧窶。典與佐饔飧。賣襦賑鰥姥。任滿陞冷曹。廠署清源滸。清源何繁華。工部視如土。亦如廣武時。閉眼卻阿堵。貌羸弱不勝。卹復見華臙。貧世獲茲人。是謂今而古。北斗仰高風。忽於猶子賂。了無營梁容。落落一叔父。不敢款酒肴。况乎給資斧。猶子豈爲奇。孤高世德譜。飄然上平陽。傾蓋情如縷。贈以玉壺冰。工部應無怒。

清獄

下車泣囚心。千載生生意。願茲縲絏場。慘烈魂爲悸。旱魃煽炎威。能無冤氣積。齋沐虔以清。滌掃周爲視。爰築好生房。庶廣犴狴嗣。入獄疫自除。生子吳爲字。善氣滿愷囊。絃航渡法地。虐吏何爲者。競以殺爲媚。

訓子

願爾碧未垂。詩書急討論。人禽此其界。得失爲之根。勿驕貴而氣。勿縱放而言。清貧念爾祖。忠厚乃吾門。十寒則一暴。舍亡則操存。寧拙勿爲巧。過樸不厭渾。斯語置座右。奉爲金石尊。

憂旱

河北怒未已。旱魃驕益熾。山川何滌滌。千里幾赤地。仰瞻雲漢憂。能無監門淚。竭茲齋禱心。效能屠酤肆。愆尤省厥躬。精白感天意。一雨霰霖生。再雨優渥遂。大有卜今年。小民戴靈賜。聲歡動千雷。憂隱中如刺。人曰旱之終。予謂澇伊始。旱澇巧循環。相因復相視。亢陽滿則除。陰霖芽且萃。寄語河上翁。莫以泄沓戲。

賑饑

羣盜蝟河北。長堤嚙陽侯。顧茲子遺黎。能無惕惕憂。捧檄煮粥糜。晨起驗斛區。僂僂積廠市。匍匐飽菑疇。寒風何浙浙。野杵亦叟叟。嘔心輸粒籽。屈指數麥秋。緩徵白骨起。減租菜色廖。耘茲一寸田。何必萬石甦。撫字甦部隱。陋彼移粟謀。

南雍七子詩

天涯宦蹟左遷多。每誦斯言殊增浩嘆。南雍豈其地耶。何遷人蟬集也。良友如雲。蔚焉劍合。亦一時之異也。作七子詩。

姚都諫思孝

淮南春翠藹。幽谷何窈窕。文章煥國華。風雅矜清妙。花磚拂瑞煙。梧掖紅庭燎。搖筆掃檣槍。請劍撼蒼嶠。錯落風雷泣。震盪山鬼嘯。敵氣駭秋塵。神龍軼險突。環玦循無端。瑚連重清廟。南國有佳人。北極遙瞻眺。

李侍御謨

天上仙人謫。三吳起鳳翥。趨庭富縹緗。譜縣蜚清譽。馳豸驚郊甸。繡斧悔貴倨。蕭蕭仗馬鳴。莘莘朝陽曙。
園桃寄行謠。槃澗矢寤語。文史闕高齋。公侯爾逸豫。

王給諫之晉

氤氳積河雒。蕩宕水瀾灞。高慧追前哲。秀挺產靈姿。三輔漢循良。梧垣振風規。抗筆搖青霄。折檻鳴赤墀。
勁骨激高倡。素氣斂冲夷。焚香而隱几。悠悠證退思。羨門子何人。仰止是吾師。

張簡討居

上谷鬱英蔚。灑氣涵淵穆。峭石逼嶙峋。孤煙浮大陸。冠笏玉階升。簪珥金甌卜。紅藥霧霏霏。瑤草風謾謾。
霄漢翔鳳鸞。霜雨凌鴻鵠。倚徙鐘虞間。蒼莽崧衡矗。

金選部郎贖兼

大雅推前輩。領袖羣案先。翩翩皇華節。蹀躞春明關。山川何碩儼。湖水亦凝然。清輝澄金鏡。冰雪靜炎天。
遁思林泉駕。省眼借名賢。時事值紛紜。砥礪徒自憐。矯矯煙霄客。猗歟簪紱仙。援鶴久相狎。芝草若爲延。
願茲秣陵選。秋風速錦鱗。

劉儀部士連

湯湯遼水闊。之子揚清芬。峻骨黃金重。天衢浩鴻文。飄然眇華要。肝腸濟雪髮。胸攬梁園秀。筆空劔塞塵。
抱志在靜遠。世味何氤氳。素心夙相照。夢寐若爲羣。

自序

淒淒風雨夕。俯仰更誰論。束帶趨承明。惕惕戒晨昏。爰覽山川勝。春晴照白門。蕩然天地在。庶幾吾道存。睥睨浮雲意。嘯歌金石文。慷慨隨所如。形骸若爲珍。此行殊寥廓。玉汝以淵源。

贈姬太僕太僕舊滕令也滕陷太僕死之贈今官子琨爲戶部郎乞詩贈焉

天荒塵日霾。谷撼沙風謖。寒戍吹悲笳。嚴城拂迅鏃。羣虺積塹叢。萬狸竄厓濱。妖虹繁炎颯。兵焰毒龜麓。糾桓鳥獸訂。刀戟煙雲縮。三日黯琴甕。孤軍慘饑燭。樓櫓橫危埤。鞬弓懸磬瑟。嚼齧噴雪寒。漬血濺霜肅。紫電氣陰森。青史星光昱。強哉昔常山。歸然今太僕。

申端愍公詩集卷二

七言古詩

冉子祠

烟火寥寥瓜井邨。秋風落日伯牛墳。巋然老樹碑陰矗。聽影泂光拂壠雲。仰止斯人名不腐。科懸德行書懸譜。平原賓客氣如虹。沙草榛蕪何處土。半世車塵歷落中。九京贏得鄆侯封。一抔伏臘驚樵牧。靈雨春滋卉木穉。傳浴溫泉事恍忽。石青篆碧探殘碣。聞風興起古今情。何問衣冠何問骨。

楊椒山先生祠

十載公車過上谷。成仁祠下霜風肅。拜像擬招忠愍魂。拂碑欲食分宜肉。父子閣老餒薰天。滿朝那復着奴顏。十罪五奸鳴仗馬。誅兇一疏日星懸。天地昏霾神鬼泣。浩氣丹心血化碧。含笑龍逢地下遊。英靈縹緲直聲奕。吁嗟乎。屢市冰山頃刻形。殞繫俎豆千秋榮。分宜當日心已死。忠愍今日氣猶生。

寄祝楊春臺同年

吾郡同年十七人。惟君與我情更親。地分百里雖懸隔。夢寐周旋笑語頻。一日君來謁太守。留連蕭寺三更酒。約予共作清源遊。鷄黍相邀不置口。長至纔過踐素盟。奚囊驢背到甘陵。款扉倒屣歡迎入。下榻挑燈意氣橫。暢飲高歌幾日夜。忽聞兵逼遵陽下。匆匆分袂整歸鞭。半擾離憂半恐怕。冬盡都門報解圍。春

光倏忽柳花飛。小牕偶坐翻年譜。二月知君誕降時。不謂同年爾我獨。同年同月伊爲熟。只茲明媚仲春天。廿九爲予君廿六。選筮題詩代舉觴。維祺首爲祝高堂。蘭芽蚤接瓊林瑞。棣萼平分桂樹香。大物明年知唾手。南宮奮發仍黃者。同飛願得附青雲。予亦因之而不朽。

登刻鳳樓懷李小有

仙李當年寓此樓。下樓倏忽已三秋。每於碁罷閑登眺。搔首渾如天際頭。刻鳳主人曾到魯。邸逢小有話離苦。重來樓上問何期。日選十三月選五。五月明朝恰十三。計程三日至清源。先期不見飛鴻信。予懷渺渺默無言。安得翩然蚤握手。樓頭十日留小有。如雲樓下訂前盟。一曲長歌百斗酒。

將進酒

君不見健兒騎馬捷追風。縱橫十萬屯盧龍。又不見漁陽將領燕姬妾。骷髏半帶豺狼血。洛干還是太平春。笑爾何爲愁不輟。寬解胃腸惟醉眠。羞澀囊中探數錢。且酌且歌且自舞。醉來白眼欲問天。高陽徒麴秀才呼。我共追陪秉燭熬長夜。狂呼大叫聲如雷。百斗頽然復一斛。星淡蟲飛晨光開。臥倒如泥醉欲死。強起顧酒心不灰。一日餘生一日醉。酩酊傲殺醒眼輩。不必玉薤并羅浮。濁者澆臍清沁肺。一片月。十里荷。攜壺處處醉顏酡。那問人世有干戈。

昌黎令左六語同年以守城功擢憲副詩以寄懷

科目自來縣甲乙。乙者那復與甲匹。三鎮循資選重臣。邊郵謂已斷罽策。忽報敵兵逼薊門。聞者瞠目失

精魂督師觀望籌莫展。開府投繯染血痕。敵兵東走盧龍獵。薦紳崔白開門接。鏡歌鼓吹詣穹廡。鐵面貂裘擁伎妾。君不見昌黎左邑公。死守斗大一孤城。四圍三市喧鼙鼓。矢石交下戰場腥。烽火叢中飛露布。廊廟諸公相愕顧。有人從此重書生。喜動天顏拔憲副。昌黎資格問如何。熹宗朝薦孝廉科。叛賊崔白不足數。督撫相看孰與多。策勳砥柱綸音灑。莫拘甲乙分高下。須知風塵草澤中。英雄多少昌黎者。

太康令魏于野殉城烈烈弔以詩

秋風獵獵葵邱道。衰草枯林吹野燒。令君躑躅女牆低。煙火陰陰照寒嶠。黃沙慘澹太康城。賊騎環圍萬堞平。羅掘雀鼠紅焰起。令君血淚裂雙睛。戍樓霹靂天鬼怒。睢陽平原君其伍。青史白虹刀戟橫。千家觸體泣酸雨。滄桑易位陵谷翻。精靈不死鬚眉尊。憶君道左綈袍語。曼歌淒咽擬招魂。

申端愍公詩集卷三

五言律詩

夏日齋居

斗室裊幽光。爐薰百和香。累書堪作枕。支石可當牀。樹色連雲密。蟬聲帶雨涼。北牕高臥久。一夢晤羲皇。

懷李聰巒隨宦新甫

少年何大雅。標格更多奇。灑落羲之字。風流白也詩。舊狂看擊筑。新恨聽歌驪。無耐相思處。空階夜雨時。

其二

謫仙天下士。聲價仰鷄林。我質堪攻玉。君情可斷金。風騷推酒聖。山水識琴心。悵望天涯隔。啼痕灑素襟。

其三

御李非朝夕。相看眼自青。秋風同宴鹿。夜雨共囊螢。乍別分雲樹。餘愁付醖醢。出門誰是侶。白晝小齋扃。

其四

臨別河橋上。扶桑日正暎。披襟頻握手。歧袂欲消魂。濁酒留征騎。清風促去轅。今宵何處宿。曾否憶家園。

其五

從宦遊齊魯。雲山望裏開。清光留宴席。佳氣照徂徠。獨我翻書帙。同誰酌酒罍。歸期何日是。把臂坐莓苔。

其六

榆社纔分袂。臨淄聚客星。晝長知課弟。衙靜憶趨庭。夙好憐風月。離愁恨水萍。寒牕今冷落。悵我倚疎櫺。

其七

一望雲烟渺。蛩聲四壁秋。有懷頻問月。無興強登樓。水隔三秋恨。星分兩地愁。相思渾不寐。欲汎剡溪舟。

其八

飛鴻銜入素。秋杪是歸程。掃徑迎霜色。留杯醉月明。牕虛看雁影。院靜聽砧聲。好踐庾樓月。狂歌整舊盟。

元宵風雪獨酌次宋仍白韻

暮雲含月影。燈映雪樓明。梅凍寒香散。簾疎冷氣生。煙花迷火市。笙鼓亂春城。半榻假爐坐。陶然酌巨觥。

哭鄭蕙圃八首

憐君方壯歲。一病果難支。仁者何無壽。天乎詎有知。共欣初展驥。豈料遽騎箕。言笑依然在。淒風攪夢思。

其二

白玉樓爲記。翩然去不辭。六旬應念父。七歲忍拋兒。黃卷生前事。青衫死後遺。幽明從此隔。渺渺竟安之。

其三

功名同頽頽。意氣許千秋。愧我貧如洗。憐君病不瘳。歌殘流水調。影散碧雲樓。吾黨今寥落。交情何處投。

其四

百年俱幻影。修短問誰逃。吾社無牛耳。君家失鳳毛。雄心三十折。苦志半生勞。知己頻揮淚。寧堪續楚騷。

其五

其恨哲人逝。千秋事業虛。蕭疎空院竹。冷落滿牀書。夢斷池塘草。魂依廣柳車。黃昏風雨夜。獨坐幾欷歔。

其六

天上庚星暗。修文奪雋才。荆花欣共茂。蕙草恨先摧。劍掩流虹色。珠埋長夜臺。臨風歌薤露。瑟瑟助餘哀。

其七

識應龍蛇夢。年來失鄭元。遺琴悲響絕。贖筆羨如椽。易篋應憐爾。撫膺叩彼天。圖書收入篋。不上孝廉船。

其八

三年纔際泰。一旦又遭屯。長恨遺妻妾。孔懷賴弟昆。有銘聊紀蹟。無賦可招魂。不信英雄淚。靈衾試驗痕。

登盧見白新樓

忽訝朱樓起。凌空氣象殊。藻香分璧水。樹色傍城隅。劍合長虹燦。燈懸片月孤。臨風慚作賦。叨醉步兵廚。

其二

空齋不耐寂。乘興數登樓。問月敲碁夜。翻書下榻秋。煙光四野合。雲樹一天浮。吟眺渾忘去。凭欄豁醉眸。

且隱齋

不必山林臥。空齋白日幽。苔溼晴亦雨。雲冷夏疑秋。香篆沈金鴨。湘簾下玉鉤。此中多隱意。抱膝思悠悠。

除夕

長安烽火熾，愁問歲華新。正是勤王日，誰爲破賊人。乍驚離亂地，回憶太平身。願得春音捷，安居不厭貧。

除書

除書六月下，束帶促星軺。憑我誇強項，逢人自折腰。紛紜驚積牘，奔走溷卑寮。仙令俱虛語，幾人王子喬。

之任

問渡大河口，離舟卽下車。登樓城樹迥，掃榻夢思賒。暫乞趨迎假，閒排朔望衙。予懷忽渺渺，滄水天之涯。

雍邱道中

望望雍邱驛，村雞報午餘。遠林銜塔影，細雨落肩輿。瘦骨風塵倦，吟眸眺覽舒。平蕪敷野綠，山叟荷春鋤。

贈別陳子

悠悠滄水夢，落刻溪舟。竹亂連牀雨，燈懸一榻秋。奚囊詩草黯，客舍墨香浮。前路誰知己，天涯破阮愁。

贈郭子

下榻留征騎，燒燈共客吟。萬金烽火信，一夜故園心。韻骨風塵老，交情契闊深。行行須鄭重，兵氣滿山岑。

其二

策蹇成孤往，吟魂逐夜賒。平生猶雪意，消息此梅花。賊起兵爲路，身閒客是家。寒雲迷去眼，翹首葛山遐。

其三

避亂疑無地，清平尙有斯。千軍猶勝負，一水卽安危。梅苑調孤鶴，琴軒鈔舊詩。清緣應共享，落落問何之。

其四

爲有探梅約，飄然訪戴船。干戈行路滿，詩酒客心偏。孤榻無塵牘，寒衾欲雪天。此宵須痛飲，離思在前川。

過黎舍中生祠

山斗關西望，文星照浚儀。攀留依衆母，瞻拜仰吾師。兩地絃歌續，千秋德政碑。春風霏化雨，醜酒使君祠。

夜泛

蒼茫浮一艇，兩岸受風徐。拂袂塵顏澹，懸帆客感疎。星輝不似夜，浪定穩於輿。片月神孤往，蘧蘧夢覺餘。

杞園晤秦聖俞

逐逐風塵色，聊偷一席閑。聯牀刪宦格，伏枕話時艱。舊好添愁鬢，新聞冷笑顏。脊梁須豎起，百折耐間關。

感事

借箸偏曹濮，長城失太行。黃榆飛潞澤，王屋下邢襄。骨悸聞風鶴，魂腥逐刃鎗。大河千百里，莫謂惜纜長。

其二

烽火連輝濟，橫尸覆野蒿。金錢明主詔，斨斧大軍勞。精悍矜三捷，縱橫問六韜。彤弓方鄭重，敵愾自同袍。

其三

洪流天塹折，防渡勝防城。樓櫓寒濤斷，旗帆落日橫。此中大澤險，到處野狐鳴。莫但愁河北，三湘亦弄兵。

其四

羽檄夷梁震。兵荒患剝膚。飽騰催布駿。匍匐問蠲租。戰捷功方上。佻離骨已枯。將軍馳露布。願附監門圖。
弔劉烈婦

衛國有烈女。高風俗可維。形骸委土木。巾幗傲鬚眉。冰雪霏煙樹。松筠覆野碑。三年官愧我。爲補柏舟詩。
甲戌二月九日

春明千里雪。回首五雲深。真幻當年夢。推敲此夜心。彈冠悲往遇。擊筑欲長吟。荏苒俄三載。牢騷思不禁。
贈別馮作霖

宦情驚夜雨。蹇影度春陰。侍立憐僮意。興居慰客心。劍分虹自合。雪滿玉爲林。明月今何夕。高吟拂素琴。
李映碧給諫謫歸

落落江煙白。脩然孤眺餘。浮雲凌短筑。春色隱華裾。焚草乾坤在。脂車風雨疎。首搔天際碧。湖海祝虛徐。
其二

醉酌春明酒。高鬟漫遠潮。挂帆江國遠。彈劍野雲遙。翫麟千秋戀。嶢嶢一葉驕。氤氳霏雨露。環珮接仙韶。
懷歸

秋澹寒煙合。浮雲碣石宮。乾坤惟伏枕。身世此驚弓。雨雪霏輕轂。藤蘿竊碧虹。聰明山不遠。青翠落空濛。
其二

紫葛參差秀。臨風欲躡從。林巒鄉思切。霜雪宦心慵。芳草隨雙屐。疎煙傍短筇。百年春事老。幸我未龍鍾。

其三

盜水午橋曲。遨遊卽錦江。鷗盟依雪棹。漁酷汎春缸。仕蹟慚冰鏡。鄉心傲碧幢。入林甘自矢。漫隱學南淙。

其四

一線清漳水。瀾瀾泛遠陂。江湖原汗漫。菰藻任葳蕤。霜老伊人在。春深季女飢。採芝南澗下。從此慰期頤。

其五

十里芙蓉國。城闌香氣霏。樓心浮翠杏。潭影下清暉。世路俱流水。秋風一釣磯。疎狂原具癖。能與素心違。

其六

煙樹中丞墓。南園十畝居。醉餘澆野竹。睡起摘畦蔬。佃僕驅犂犢。兒童慰笱輿。春城風雨事。搔首問村墟。

其七

蒹葭天際碧。歸夢矚平蕪。秋墅開萼渚。煙隄集野鳧。茅茨諳素業。風月恕狂夫。不信沙洲遠。雲空雁北呼。

其八

未熟邯鄲夢。黃梁祠在西。水村煙杵隔。野火嶺雲低。車馬山靈笑。鶯花客思迷。仙人不可見。咫尺是丹梯。

其九

逐逐塵顏老。蕭森木石齋。論文惟白社。歸計只青鞋。澹宕煙篔月。參差玉樹階。掩關秋雨靜。如水宿心諧。

其十

鋤茅結草屋，透邇滎陽隈。樹樹嵐光合，村村寒日開。雨聲凌野塔，月氣射叢臺。非市非山際，橫襟一舉杯。

其十一

寺憶讀書處，清鐘識慧因。閒僧皈貝葉，薄宦愧霜筠。水木通禪理，人天有靜春。灑然塵劫外，印合宰官身。

其十二

望望南隄路，春遊鷺舳雲。虹霓原劍合，車笠倏星分。不爽幽蘭約，重尋白鷺羣。荻花沙水岸，鳥語隔煙聞。

其十三

黃沙村塢合，層樹數衡門。靈雨浸畬徑，麥秋灌菘園。烽煙客夢繞，鷄黍古風存。半隱雙扉寂，棲遲問主恩。

其十四

愁鬢驚秋簪，幽棲夢亦安。辛勤惟採蕨，報答此和丸。煙雨從芒屨，風華傍鷓冠。京塵高馬足，客思濁漳干。

其十五

羣盜縱橫極，愁來冷笑顏。洛州關上月，粉社夢中山。天怒風蠶惡，雲空木葉閒。家園一夜淚，隱几落潏潏。

其十六

毛塚荆榛裏，溪橋細雨天。浮名銷白日，流水託朱絃。塵滿橫戈地，雲生落照邊。撥鳴空谷外，憑弔亦登然。

其十七

城角高樓起，清暉眺碧寥。凌風堪拂袖，凭檻任橫簫。放浪浮鷗嶼，艱危悟鹿蕉。旱蝗千里赤，三徑已蕭條。

其十八

青天蜀道險，安步入南郊。載酒謀逃世，藏書著絕交。馬瘡憑蠟屐，鳩拙認春巢。白眼雲霄上，無材自苦匏。

其十九

趙陵新戰壘，愁思在東臬。野水消塵騎，春煙醉濁醪。素琴奄往事，高枕屬吾曹。感慨官爲累，晨風拂鬢毛。

其二十

非不春明戀，其如風雨何。孤煙歸大麓，曉日渡滹沱。飄渺空聲相，鴻濛發嘯歌。佛樓霄漢迴，醉眼碧巖峨。

其二十一

秣馬晨征意，心旌亂曉衙。低回憐鶴影，消息問藤花。紫蘚春前綠，婁山雨後霞。豐林千里夢，渺渺落天涯。

其二十二

豈敢嗟時事，風塵已辦裝。行藏餘馬骨，歲月忤羊腸。雲滿鸞鷺國，沙高薜荔牆。升沈天莫問，倚仗聽滄浪。

其二十三

刻鳳樓頭月，芸暉續舊盟。綠筠垂几席，白酒坐柴荆。離亂朋情合，登臨雁羽輕。連牀虛榻待，鄉國有嚶鳴。

其二十四

草堂尋舊蹟，結構水南亭。竊祿三年素，謀生十畝青。秋蘭春藥白，竹院譜茶經。攜手同心侶，京華悵落星。

其二十五

蓬華臨寒井。春欄憶共凭。一行膺紱組。十載隔晨興。羅雀地題署。冥鴻亦避繒。春陰臨大伾。矯首欲飄凌。

其二十六

支離愁病骨。圻甸朔風柔。此日多麟鳳。一官自馬牛。霞城青岱嶽。龍瀨碧潭秋。雙眼乾坤外。生涯在十洲。

其二十七

盤礴高爨上。蕭疎萬樹陰。世情何按劍。吾道合抽簪。黃鳥春林語。秋蟲夜雨吟。中懷聊自喻。山水寐言深。

其二十八

亂後脩山墅。新豐易水南。邢州烽燧逼。王屋樹煙含。故老存袍澤。鄉風是織蠶。索居何落寞。邨市有叢譚。

其二十九

籃輿蒨茗下。春夢攬霞襜。詩酒情原狎。溪山興不廉。狂其從畢卓。簡則學陶潛。豈必麒麟閣。勳名乃合尖。

其三十

桑乾河水白。無恙挂秋帆。雪滿高人屨。風吹隱士衫。論交俱六吉。閱世欲三緘。蒼莽恆陽樹。天風振石巖。

臨淮道中

驅車巉石路。日暮倦高翰。山鬱銜青霞。星微澹野瀾。敲詩燈焰逼。拂劍旅魂安。名勝乾坤在。霜風木榻寒。

九日過滁問卿沄盤先生招飲陽明先生祠

東籬何處酒。此日恰登山。雙屐濤煙溼。孤筇柿葉斑。逐臣天地闊。勝會壑雲閒。學道他年事。蕭蕭澹客顏。
木末亭觀雨

樹杪懸空鷲。亭皋引杖藜。江涵光泠泠。日暈溼垂垂。我輩人天合。羣山煙雨宜。僧閒掃落葉。霞影散葳蕤。
雞籠山晚眺

落日陟高原。臺城秋樹存。客勞湖影靜。佛古塔光尊。山宕僧能睡。竹深鳥不言。空虛皈片石。把臂欲探論。
水西門外汎舟

載酒臨寒渡。春陰罨客廚。翠微天闕樹。煙雨莫愁湖。雙鬢憐沙岸。孤舟寄野塢。江雲何黯淡。欲乃若相娛。
雨花臺

梅岡春雨霽。遊屐滿嶕嶢。煙柳於三月。風華澹六朝。霏微禪逕溼。醒醉粉香銷。漳水南園綠。相思客夢遙。
秦淮夜汎

客夢寒村水。春浮細雨天。桃笙清吹落。梅閣翠花懸。燈影翻詩葉。漁煙罨酒船。相思芳樹老。纖月亦嫣然。
鄭超宗孝廉仝姚永言都諫招飲影園賦贈

片艇匆匆渡。深霄澹澹過。道心蘭芷合。星氣影園多。季女相憐語。孤臣一晤歌。清漳懸十畝。做汝問煙蘿。
連白石前輩贈鴻鵠翁詩一章後學申子偶讀而壯之次其韻

莽莽聽煙鷗。蒼茫關樹深。山青碑是史。官墨堊存箴。萬乘批鱗氣。千春仗馬心。歲寒詩句在。倚劍雪花侵。

卽事

世事今寥闊。春風且客杯。天高雲濟宕。客靜鳥徘徊。海國烽煙劇。西山翠色開。悠悠薄宦意。倚徙蕩塵埃。

其二

嶢嶢雙闕迴。縹緲宦情微。掃榻春深巷。扶筇日掩扉。江湖猶汗漫。琴酒亦清微。往事看炎雪。浮雲濟客衣。

其三

名豈山公著。疎狂曼倩同。寒雲憐失馬。鳥語悟傷弓。萬事春煙外。孤亭細雨中。病看山遠近。倚檻慰飄蓬。

其四

赤羽孤城合。黃塵野獸悲。乾坤何鷲粟。風日自逶迤。官冷禽魚狎。庭閒草樹滋。天涯懸客夢。渺渺濁漳湄。

申端愍公詩集卷四

七言律詩

帝京樂

春明車馬接清響。風雨誰歌載道難。瑞日華峯看拄笏。浮雲雙闕問彈冠。鶴廳藤樹垂朱實。鯨海虹橋散碧瀾。石磴竹菴魚鳥闔。相將嘉會證檀栾。

家園樂

吟魂日逐滏河濱。擊鉢呼瓢待主人。白社生涯懸十畝。青溪消息屬三春。藤蘿啓事江湖遠。風月憐才雨雪新。矯首午橋煙樹外。醉醒雙眼臥苔茵。

春興和韻

霰氣寒花處處飄。春城煙水溼青條。鶯聲細柳鶯陰落。帘影新豐酒市遙。日盡雙扉虛鳥雀。宵深清簟冷霜銷。樹低縹緲孤雲滿。蕪草茸茸踏午橋。

其二

冉冉晴煙碣石塵。聲繁簫鼓澗花春。劍搖赤羽迷寒渡。月蝕黃蘊斷野榛。炊火煙橫山墅闕。毳廬迤邐塞雲屯。寒衙索米凌淒月。芳樹邨醪傍葛巾。

其三

雪苑銅駝問淼茫。丹樓粉堞繫沙棠。煙深王屋山山白。秋慘陳橋樹樹黃。萬事滄桑雲窈窕。孤城燈火月蒼涼。并州花鳥吟魂媚。冷雨青燐泣野篁。

其四

榆關如線碧天流。紫塞黃崖鐵篋秋。白日漁陽山戍黑。霜花烏嶼陣雲稠。孤帆影斷呼庚癸。一派星熒照鬪醜。掩袂長歌雙鬢老。絲絲淚雨溼箜篌。

其五

依然百雉險巖從。一夜腥風射棘叢。巨鹿孤營沙磧外。滹沱古渡夕陽中。健兒奔駝躡驍馬。諸將逍遙掛角弓。重憶昔年村社酒。麥秋無恙雨濛濛。

其六

漢水樊城逼鼓鞀。大隄花點曉煙迷。九江鉦鼓凌天險。萬國梯航問野湄。開府登壇懸鵠印。朝廷推轂擁龍旗。秣陵笙管秦淮渡。欸乃魂搖畫角吹。

其七

閭闔露迥紫氣寒。女牆高砦霧霏霏。天懸睥睨盧溝月。山逼巉岉易水灘。羽檄橫馳連朔漠。鏡歌飛捷沸長安。明光廣和陽春曲。氣合雙龍倚劍看。

其八

春明愁緒倚青柯。細雨孤尊此嘯歌。人事物華餘汗馬。朔雲邊月悟煙蘿。浮邱山畔懸丹竈。菡萏池臺掛碧簑。矯首看天天遠近。吟髭如雪夜來多。

季夏全李郁林盧省潛盧靜虛劉建侯郊外泛舟歸飲賈襄一書舍

乘輿飄搖一葉舟。閩仙許我過齋頭。青氈趺坐蠶書帙。白眼斜看醉酒甌。樹隱蟬聲方噪暑。風生羽扇忽驚秋。歸來不盡登臨意。何日聯翩續壯遊。

寓清河聞警

甘陵一夜客心驚。聞報漁陽受敵兵。共道聖明方應運。如何盜賊敢橫行。千軍滿地骷髏血。百里連天鼙鼓聲。肉食尋常矜勝算。問誰今日請長纓。

余侍御隨車雨

聽馬南行豸繡香。如焚天氣忽生涼。隨車喜灑平原雨。驅魃驚迴御史霜。靈旣有權何杲日。麥秋無恙卽甘棠。商霖遍慰瞻霓處。豈獨流膏在滏陽。

元宵風雨寄懷小有次賈襄一韻

冷落春城澹似秋。蕭蕭良夜阻狂遊。風吹燈火雲何黯。雨亂笙歌月亦愁。獨坐有懷燒燭盡。相思無夢到牀頭。應知白也佷紅翠。醉倚朱欄十二樓。

其二

陰陰火樹滿天秋。風雨誰堪秉燭遊。笑我孤吟偏不韻。憐君獨醉更多愁。三生意氣何青眼。一夜相思幾白頭。願得來春燈市裏。長安同上酒家樓。

聞捷

公車落魄壯心殘。捧檄魂驚拂眼看。數載自憐三別足。十年誰料一彈冠。征袍雪滿痕猶溼。匣劍光搖色尚寒。莫向春風誇蹀躞。機聲斷續憶熊丸。

隨駕步禱天壇恭紀

文華齋宿帝咨深。南望郊壇玉趾臨。祇爲萬民祈潤澤。敬將六事問桑林。星馳鷺序清光竄。雲覆龍旂夏木陰。趨侍天顏看尺五。乍驚茅賤廁華簪。

過大廷尉張潁東先生故居

助庸那復恨夷陵。春廠龍門喜乍登。官以素盟知世冑。事從父老問中丞。恆山猶借甘棠蔭。浚水應騰桂玉稱。回首午橋開府墅。松楸似此鬱葱曾。

其二

文章牛耳斗山名。振起中原白雪聲。鐘鼎器從爐冶出。綸扉春向藥籠生。箕裘世衍青緡業。杖履風高白社情。莫道樵漁忘魏闕。陰陰桃李自崢嶸。

其三

春滿滹沱憶使君。名垂竹帛淨煙氛。燕關不改旌旄色。麟閣猶驚頗牧勳。正色拂衣何矯矯。低顏獻媚任紛紛。哲人雖逝芳聲在。不是虛傳諫獵文。

其四

十年南北渺雙魚。浚水新除六月書。蔽芾棠陰留召澤。繽紛玉樹拂潘輿。兩河聲著鳴珂巷。四壁詩留退食居。公子風期殊落落。懶於官舍曳長裾。

渡河閱兵

春風百里大河清。醴酒臨流欲洗兵。帆影低垂迷野渡。浪花高濺射霓旌。登舟氣奪萑苻魄。鳴鑼音聯歎乃聲。青野塵消烽火寂。桑麻踏徧話陰晴。

壬申元旦

十年落魄老燕京。蹀躞春風荷聖明。一命濫膺花縣宰。兩河羞振鐸音鳴。椒盤初薦歌堯壽。斗柄星迴詠夏正。願得浚郊爲樂土。桑麻無恙綠林平。

元宵夜酌

簫鼓花城處處聲。銜齋命酒牘塵清。踏歌斷續屏音亂。燭焰參差火樹明。香入詩脾梅問約。寒侵鬚骨雪尋盟。春風淡宕絃笙沸。臥理閒舒樂只情。

課農

霏微曉色促星車，踏徧春畦到日斜。
負郭四郊俱種穀，河陽一縣卽栽花。
犬聲斷續知邨塢，帘影高低辨酒家。
父老共商南畝約，公餘重許話桑麻。

讀王肅敏公集

灼灼聲華北斗懸，青緗大業照遺編。
中原才子先何李，魯國文衡竝蜀燕。
采振木天驚素鳳，名高梧掖愧寒蟬。
如今海內知司馬，一劍龍精有世傳。

壬申初度

崧高惟嶽愧生申，狗馬微辰又值春。
螢火十年孤子淚，風塵初度宰官身。
衣冠客集稱觴滿，玳瑁筵開戲綵新。
去歲草堂今日宴，泥金聲到滄陽濱。

同熊輝玉蘇石公渡河感賦

檄傳東海又橫戈，浩浩洪流感慨多。
我輩爲情原似水，此心不共有如河。
懸旌一掃樓槍氣，擊劍爭聞欸乃歌。
無恙布帆春色老，扁舟醞酒問重過。

贈別駕王仁之

藜光照映極星高，白社青山醉濁醪。
濠水盈盈懸劍履，浚郊子子愧旌旄。
騷壇久豎中原幟，寶氣常涵別駕刀。
何李淪亡春雪黯，乾坤同調屬吾曹。

煉城口閩工

水來天上險黃河。牛馬風煙日日過。雁落長隄寒杵動。鴻飛中澤夕陽多。荆隆一夜桃花發。練苑三秋瓠子歌。收得安瀾碑勒績。禹功樓上望仙舸。

課士

落落文星壁水清。中原牛耳恨寒盟。草元乍廠談經席。問字偏含下榻情。劍合虹霓成五色。賦裁珠玉動連城。春林載酒聽黃鳥。遮莫嚶嚶喚友聲。

偶懷

秋風一棹浚城灣。斗大孤村此抱關。病卻風塵聊濁酒。倦登齋閣卽青山。麥秋無恙花封寂。詩社多緣韻事閒。渺渺予懷天際闊。藕花十里夢中還。

贈熊輝玉廣文

南州高士久馳聲。載酒元亭韻骨清。虹氣一天龍劍合。祥光百里德星明。文章君豈青氈老。肝膽吾將白水盟。落莫相看交道古。紛紛輕薄自人情。

喜雨

長隄夏木拂輕陰。輿夢悠然灑素襟。遠近山光含靦影。參差樹色隱蟬吟。千箱共話逢年約。五斗應知退食心。喜雨亭成翻罷酒。河流極目悵秋霖。

聞廣文賈襄一被劾

彈章何事到寒旆。歸路蕭蕭俠骨堅。道已將窮文未喪。世曾欲殺我猶憐。青山白社囊新草。赤水丹爐鱗大還。荒蕪故園松菊老。一犁春雨汝陽田。

贈別徐絃亭

一榻塵封退食軒。何來徐孺下陳蕃。不辭剡水三冬棹。豈但平原十日尊。風月有緣分主客。菊松無恙訊田園。蒼茫雲樹天涯別。雪滿高衙有寤言。

詠汝南先祖姑太宜人

月旦高懸畫荻堂。神從地下欲相將。婺星久照宜人傳。皎日常垂太史章。有子能存千載祀。此身不死百年康。于公駟馬臨祠宇。彤管香留鬱秀芳。

善海來報最

聖主旁求耳目臣。三年課最報楓宸。都亭早辦豺狼疏。瑣闥行清輩轂塵。兩邑歌聲出畏壘。九重敕命下徵輪。於今肅卻山公席。指日雲霄問要津。

訊王仁之病

燈花綵勝滿春城。高臥如何一榻清。白社苦吟憐太瘦。丹爐新熟問長生。虹流劍氣天邊合。蚌產珠胎掌上明。好踏星橋扶杖起。簫絃隊裏雜吹笙。

黎伯雍報最

才子專符捧御除，循良今上雒陽書。三城花繡潘安宅，萬樹棠甘召伯岡。丹鳳詔來雲作錦，雙鳧鳥下雨隨車。長安近日虛銓席，翹首新綸出帝居。

留別劉熙隆

夷梁劍氣滿寒林，一葉浮沈碧水深。客淚淫淫驚夜雨，予懷渺渺恨蚤吟。十年伯仲朱絃奏，千里芝蘭白雪音。蕩漾波光催去棹，相思夜夜浴陽津。

贈別盧鄰虛

春風夜夜步兵廚，官思鄉愁兩地俱。下榻十年憐刻鳳，揮琴一室愧飛鳧。梁園白雪虹光合，浚野朱旄劍氣殊。回首午橋天際碧，青山何日賦尊鱸。

贈別盧省潛

寒衙月霽客星懸，握手重訂下榻緣。螢火十年風雨夜，漁邨一棹孝廉船。燒燈醉拂青萍劍，擊筑高吟白雪篇。魂逐笳輿飛夢繞，相思遮莫滌陽川。

松棚侍宴

曠曠曉日靄晴暉，松幙蕭瑟傍紫薇。丹闕趨踰歌滿露，御筵錯落肅天威。春浮庖膾瑯玕合，香沁壺觴滢澹稀。稽首鳳樓迴鶴署，聯翩一路瑞煙歸。

秋夜讌集

茗痕樹影鹿牀涼。冰雪相憐萬感忘。暑逼疎藤雲濯濯。雨迴寒篔月蒼蒼。半歌半嘯新詩俠。非謔非騷舊酒狂。宦海天涯青眼合。春華偏豔柳漁鄉。

端午日鳳樓侍宴

裊裊薰風靄建章。袞龍高倚鳳樓牆。旌旂披拂霏霞爛。鸞鷲聯翩劍珮光。角黍宴排天正午。瓊漿杯滿席生香。一聲天語千官坐。響徹雲霄瑞鳥翔。

贈李聰樹

赤羽朱旗映錫鬢。風塵落魄旅情難。雲霄敢負山濤鑿。霜雪休彈貢禹冠。高館疎燈懸夜雨。春溝紅葉拂晴瀾。青湘片玉千秋合。桂樹懷人慰瘦癯。

其二

孝廉船泊藕花濱。醉眼橫看捧檄人。五色虹霓龍劍氣。十年風雨建章春。浮雲礪石金莖瑞。池草寒塘玉樹新。落落中原吾輩在。花磚睥睨綠莎茵。

贈季台臣

關塞笳聲動角弓。詩愁搖落旅煙中。綈袍繡縷燕門月。綵筆縱橫漢苑風。春雨一燈寒夜碧。浮雲雙闕夕陽紅。千秋莫負蒲輪意。曳履傳家屬鉅公。

其二

烽火遙驚塞上行。那堪握手問浮名。閉門擬著潛夫論。載酒相憐白也情。家衍縹緲傳素譜。詩連春雪是難兄。龍精一劍虹光合。宮草霏微御水平。

歸興

嵐氣氤氳水一涯。蒼茫落日樹煙斜。午橋歷歷紅亭樹。秋渚陰陰白藕花。卜夜呼瓢鄰舍酒。停雲試屐楚人家。相將二仲諱風月。何必青雲問碧紗。

宿普惠禪舍張太史如盤來晤

翠峯亂石踏青霜。貽宕秦淮水一方。南國煙花容我輩。東籬風雨過重陽。寺銜野樹窺清鶴。杯落藤花問舊狂。寒夜霜鐘驚旅夢。乾坤漠漠塞雲荒。

雪霽登謝公墩

蒼茫俯眺冶城橫。灑酒凌虛醉曉晴。梁寺煙斜林影澹。鍾山瑞靄雪花明。風流點綴園菴事。憑弔霏微屐履情。縹緲謫仙詩句老。荒臺古樹自崢嶸。

靈谷寺

春溼青苔媚客襦。斜迥十里野雲迂。珠皈佛塔懸衣鳥。繡抹春嵐點畫圖。苔逕長松煙不斷。石街健屐響相呼。禪宮香傍梅花墅。絳雪紛披簇野酤。

贈別李非熊侍御

姑射山人退食餘，紫微十載盡翻書。
玉皇憑几浮香篆，金殿開軒曳繡裾。
萬里風煙西粵外，九天雨露北
辰居。翩翩驄馬秋聲迅，明月相思客夢遯。

遣懷次王錫侯韻

抱影蕭蕭晝掩關，竹窗松几墨花寒。
雙龍氣掩青萍劍，五嶽光凌紫萼冠。
真幻禪鋒慳後悅，贏輸弈局靜
中看。燒燈倚徙懸高榻，細雨霏微鶴夢殘。

其二

春明久已賦懷歸，南國秋山澹客衣。
遊戲一官聊寄託，棲遲三徑任依違。
花慵白日呼童睡，草鬱青軒看
鶴飛。明月相思梨樹白，魚竿冷落滌陽磯。

其三

雨聲滴瀝馬聲嘶，野水清煙聽唱騶。
春樹冷魂雲泫泫，月明客夢草萋萋。
溪堂鷗隱寒暄習，山寺鷄鳴信
宿題。長揖梅花澆酒別，讀書粉社一青藜。

游清涼寺登江山一覽亭

樹杪風高四望山，青迴幽逕竹閒閒。
春浮煙雨霏微合，日擁江湖指顧間。
絲管紛紛吹客袂，香林寂寂倚
禪關。千秋羅綺朋朋井，消盡鶯花載酒還。

壬午九日口占

去年今日到滁州。太僕先生折柬留。豐樂亭前蒼樹直。陽明祠上曉霜稠。煙雲天縱雙眸入。風日山容二客遊。荻港未荒三徑在。黃花一笑故園秋。

白下再歸倦焉臥病郡公枉顧衡門率爾賦謝

蒼煙漂落野雲浮。湖海扁舟汗漫游。懸榻秋吟漸臥隱。褰帷春色破窮愁。星輝赤羽虹光合。劍拂朱霞紫氣收。才子暫隨仙守珮。青緇奕葉有金甌。

其二

瑞鶴淖沱雨霽餘。藤蘿三徑枉高車。風流太守恩光劇。潦倒狂生禮法疎。十里蓮花窺製錦。孤城秋色映緜書。千庵子子林煙直。肯踏溪橋訪釣魚。

其三

劍影凌霄一嘯歌。寒芒豈逐世消磨。名懸雙闕朱幡重。賦製連城白雪多。恆嶽岩峽驚草木。聰明空翠旭菁莪。醉餘擊石婆娑舞。白眼風塵問若何。

其四

黃金爲佩玉爲人。明月清光炤水汾。晴雨看山迎爽氣。春風載酒草元文。隨車瑞鬘千林雨。遍地花濃萬樹菁。羅爵門深耽伏枕。朱紘島島日相聞。

壬午除夕

萬騎雲奔市野塵。寒埤響栗倍酸辛。不知今夕爲何夕。恰喜明春尙有春。畫角風聲吹寂寂。戍樓燈影黯
粼粼。青徐不在榆關外。寄與籌兵借箸人。

人日

牆陰寂寂盪春澌。茗椀繩牀伏枕宜。凍壁霏微梅樹綻。拂天歷落雪花垂。今年相憶風煙老。到處遙驚角
鼓移。烽火但能邊外遠。東山好辦草堂資。

早朝

三年此日又鷄班。回首鱸魚亦汗顏。瑞靄北辰仍雨露。秋深南國自間關。邊橫煙燧今方劇。官拙風塵敢
擬閒。羸馬敝袍凌曙色。蕭蕭客思矚西山。

清明

去年寒食雨花臺。冉冉春明又客杯。南北天涯萍水合。陰晴風日柳煙開。高齋羅雀雙扉靜。塞上鳴笳萬
騎回。憑檻清吟天莫莫。行藏飄泊野雲催。

初度

蚤朝鷄唱曙鐘寒。雙闕浮雲傍鵬冠。時逼莫春猶雨雪。人逢初度又長安。頭顱漸老行藏拙。面目堪憎歲
月闌。戲綵祇懸游子夢。青青溪水問檀欒。

懷夷陵夫子

盍簪秋合媿魚魚。孤影蕭蕭斷續初。吾道一時揮塵夜。春風十載草元間。紉蘭香滿懸明月。萍梗霜般儘
空渠。頽首春陵江樹碧。爰書縹緲欲躊躇。

贈張通政重光

霏微雪逕掩莓苔。綠野煙花焰紫杯。皎月雙枝今玉樹。春風八座大銀臺。贏輸弈局青山老。醒醉禪鋒白
社開。泉石依然蓬島在。蒲輪天上問鹽梅。

重陽前五日買菊數本招蘇進士張中翰張戶部小飲

溟濛煙雨自清娛。木榻蒼然客夢孤。人我是非雲栩栩。古今消息月瞿瞿。他鄉聲氣杯無恙。此日寒暄菊
與俱。秋耐逶迤春樹老。相思滲水問尊鱸。

上范質公先生次方孩未先生韻

玉尺金繩詰匠能。歸然吾道焰瀾疑。風高奮擊江河楫。天霽孤懸日月燈。吏部文章垂斗極。老成風節峙
岡陵。東山勉爲蒼生起。白社青鞵又豈應。

其二

南園蒼煙澹隱林。蒲輪光霽五雲深。星辰清切凌霄漢。魚鳥霏微問陸沈。九廟有靈餘碩果。五湖無興寄
騷吟。圖書寂寞司空署。秋靜雲涵如水心。

其三

倚伏飛潛願力能，誰誰鳳鳥九霄層。孤臣折檻原無黨，衆正彈冠賴有朋。廊廟此時瞻北斗，秦淮久已掛秋罨。蕭蕭髮鬢國霜花，老莫向寒煙憶笠僧。

其四

烽火西京鐵騎秋，葦鱸何事賦三休。雲霄重曳尙書履，煙雨誰容釣客裘。醒夢當年憐塞馬，助華隨地汎江鷗。明光虛左鹽梅席，八座春風遍百州。

張進士父紹軒八十五初度

雪汎滄沱白社開，晴煙縹緲入寒梅。壺天風月呼瓢度，閩苑鶯花擊鉢催。黃髮丹爐懸五嶽，宮袍班綵兆三台。卜鄰何日延高榻，竹墅松谿杖履陪。

癸未除夕次韻

清漳客歲女牆風，罨栗魂吹雪影中。人又忽來天地暮，時餘今夕性情空。閉門三榻初無恙，讀易殘宵恰有功。脈脈靜香春事逼，澹然菽水不言窮。

題藏國太夫人壽冊

寶婺流暉燦曉煙，笙簫吹徹豔陽天。帝城佳氣貂蟬里，王母春風玳瑁筵。百歲含飴萱草旭，九霄接羽鳳毛翮。涓陽世沐恩光渥，國慶家禎奕葉延。

甲申元旦

澄襟危坐認元正，隱隱鐘聲入曙更。
烽火夢餘天欲旦，霰霜陰盡日爲明。
千官袍笏春煙合，一夜屠蘇旅
炊清。滙水石橋殘雪綻，紫筠綠樹憶蟬噪。

甲申二月二十三日聞馬坨野寓寶坻公署有感時令君曹公將內召

山映空峒帶遠暉，晴樓沙樹昔年非。
地經烽火寒煙亂，鳥積斜陽塞草肥。
古梵疎鐘聲遶步，孤城細雨淚沾衣。
春風信宿神明宰，又復褰帷傍紫薇。

三月十一日宿天寧寺

妙香疎磬宕新煙，花雨霏微一澹然。
餐素相人猶相馬，淚餘憂國更憂天。
邨帘寒食懸千里，竹院浮生悟
小年。鳥靜孤雲銜塔影，青嵐窈窕夕陽還。

申端愍公詩集卷五

五言絕句

秋江晚唱用解大紳韻

江頭欸乃聲，驚散寒雲影。
漁竿掛夕陽，月照芙蓉冷。

訪友不遇

塵市厭煩囂，偶來幽寂處。
水流半掩扉，坐久卻忘去。

秋日有懷

秋水連天際，鶩飛帶晚霞。
景中人不見，惆悵詠蒹葭。

其二

室邈寧分水，人遐似隔山。
蒼苔餘蔓草，誰與叩柴關。

秋興集古

秋色正瀟灑，高齋聞雁來。
我心渺無際，隨意坐莓苔。

其二

明月高秋迥，徘徊祇自知。
涼風吹夜雨，搖蕩菊花期。

其三

日暮秋風起。遙聞橫笛音。憑高何限意。蕭瑟動寒林。

其四

升高臨四野。秋色老梧桐。索莫竟何事。潯川思不窮。

其五

白露沾人袂。秋風落日斜。憂來誰共語。爛醉是生涯。

其六

野樹蒼煙斷。人閒月影清。山空松子落。淅瀝度秋聲。

其七

寂寞書齋裏。蕭蕭送雁羣。彈琴復長嘯。情發爲知音。

其八

天際秋雲滿。牀前明月光。無由一化羽。迴立白蒼蒼。

古意

纖纖弄玉盆。月掛垂楊樹。盆中影似郎。幾回捉不住。

其二

郎去幾時還。拋奴情忒寡。呪郎鸚鵡。頻叫哥哥打。

題畫

獨伴奚奴行。爲予拖竹杖。雲深遊興闌。扶爾青山上。

其二

兀坐不張琴。仰看山色渺。其中音自微。塵世知者少。

生子迴文

明月映孤桑。鳳麟鍾氣香。擎杯喜夜永。燂爛啓禎祥。

六言絕句

閨情

門前綠柳飛絮。簾外紅桃落花。寂寞不知因甚。顰眉悄對牕紗。

晝寢辛未都門

三春未了途債。千里忽縈客心。午榻一牀蹀夢。蓮灣兩部蛙吟。

其二

馬蹄周迴曲巷。客屐踏碎庭陰。拂簾聊消暑氣。敲冰暫滌塵襟。

其三

汲水呼奴煮茗。下簾任我拋書。莫愁迎賓倒屣。百官薄暮齋居。

其四

奔走以勞而倦。棲遲惟靜則清。閒廳再尋午夢。奚奴莫下碁聲。

申端愍公詩集卷六

七言絕句

搏雲吟次李香巖韻

其二
燒雲燦火雪冰敲。霧市煙樓插海潮。寒透玻璃香透水。凌虛丹閣紫雲招。

其三
冶嵐濃淡竹風閒。萬派紅光迸火然。驚眼怒濤聲觸樹。千層旭靄一晴川。

其四
月影瞿瞿鶴影疎。雨簾清閣淨名書。虎狼嗚夜蛟螭舞。十丈腥風不怖余。

其五
波紋苔繡豔高春。青棗黃芽混沌人。笑破蓮花踏破雨。白茅雙屐紫陽巾。

其六
琥珀光瑩綠雪烹。漱松嚼石咀霜英。凌空縹緲羣巖靜。譜盡千春海嶽程。

山閣高嚴帶雨眠。鹿蹤鷗跡伴壺天。茫茫大地炎雲毒。抱影蕭疎玉塵寒。

其七

風雲法戒電雷書。俯仰蒼淵碧玉除。甲子火流晴雨速。間消靜息驗居諸。

其八

驚虹灼灼碾車塵。高揖氤氳演谷神。姑射逍遙風月主。湖山介紹我爲賓。

其九

星辰歷歷電光微。瑞雨繽紛豔雪霏。絕頂崑崙天闕迴。琪花陣陣綠雲揮。

其十

太乙元根法海塵。縱橫龍虎位仙人。箇中認取眞汞落。水涵霜銷萬樹新。

其十一

摩天霹靂石尤風。魚靜蛟潛澹碧空。脈脈淨香焚柏葉。五湖煙雨恰相容。

其十二

紅塵盤礴紫霄顛。水印波痕月印天。寶筏翩翩浮玉海。籟聲風遞鷺洲邊。

黎城遇雨

策蹇聊爲汗漫遊。流光倏忽又驚秋。蕭蕭黃葉濛濛雨。惹起騷人一段愁。

獨酌聞蛙

風散濃雲月色開，柴扉半掩獨銜杯。
休嫌幽士貪岑寂，鼓吹城南遠送來。
寒食

郭外風吹撲面沙，如雲紅粉扇輕遮。
歸忙只怕清明雨，懶向隄頭折杏花。
傳臚日馬上口占

馬逐香塵走帝邦，雪霜十載破螢窗。
沙隄攬轡頻迴想，敢競看花汎曲江。
題盧鄰虛別業

東坳亭傍橫塘水，霞浸波痕影借蓮。
載酒日來聊漱石，涼陰偏趁片雲天。
其二

報道盧仝載茗來，園丁解把小門開。
碁聲敲得斜陽下，溪寂林冥尙懶回。
其三

刻鳳主人山水癖，林塘卜築解拋金。
寥寥莫笑山光遠，幽絕塵消水一潄。
其四

螺舟只欲汎霞觴，一鏡盈盈望欲狂。
歸去溪雲飛入夢，吟魂日透藕花香。
元夜口占

驚魂無夜不飛搖，纔歇蘆笳便管簫。
醉裏淒然雙淚下，豈知今日有元宵。

寒食

輕寒雨霽綠楊天。士女春畦競翠鈿。輿夢依稀山色在。洛陽極目午橋煙。
黎舍中招飲雙塔寺

塔影雙懸夏木菲。燒燈酌酒話斜暉。風輕兩袖香隨馬。一路清塵傍鳥飛。
觀麥

雨霽新晴溼野田。花城十里麥秋天。微官羞列循良傳。大有應書太史篇。
河上

長隄野市入驚濤。秋老蛟龍分外驕。人逐波光輕似蟻。那從一葉竹編橋。
其二

秋濤聲滿夕陽春。野樹蒼茫瓠子宮。極目平沙煙水斷。寥寥鷄犬識新豐。
水平感賦

依然河上一舟中。去月茫茫此月平。回首風濤轉眼定。憑虛一任自然行。
于蕃姪備兵潁上過儀信宿

絲綸新下五雲間。劍佩翩翩侍從班。展踏衙齋驚齒折。饒歌吹送八公山。

懷盧鄰虛

南浦春深汎鷁舟。煙光樹色午橋頭。吟魂幻作清漳夢。鳥影雙飛刻鳳樓。
宿小朱

一帶河流抱浚城。寒煙野杵古林平。依稀渡蟻橋頭月。照破塵顏一榻清。

聞鄒縣大兄謫官

風塵潦倒折腰難。回首浮雲問鶴冠。夢入寒廬驚夜雨。池塘詩思落河干。

哭賈襄一

天上新成白玉樓。人間忽失鳳麟儔。低回翁句爲翁慟。蕭瑟長途首藉秋。首二句襄一原詩。

遷杞別儀封父老口占

三載慚無赫赫名。去時贏得士民情。相思一夜并州夢。月色秋聲滿故城。

元夕雨雪戲占

自從年裏看春後。日盼元宵恣笑遊。到得試燈忙梅沐。風吹雪片打簾鉤。

其二

元夕燃燈陰亦暖。紅裙誰耐坐深閨。只因笙管吹心去。新著春鞦不怕泥。

其三

燈花影裏如雲亂。笑語喁喁怕失羣。冶興未闌雞早唱。牀頭盼殺醉郎君。

其四

煙火光殘人漸少。歸家簾鼓夢中聞。明朝收起新花鈿。只到清明始上墳。

遊黃梁祠卽景雜咏

傳來仙蹟在仙祠。惹得癡人望更癡。一洞喬樅魔道士。幾迴呆盼授青磁。

其二

日日青駒不斷塵。卻於此地說仙因。遍看四壁題詩客。半是當年學步人。

其三

石象玲瓏仰面看。紛紛踏碎碧香龕。摩來摩去渾無動。畢竟盧生睡得酣。

其四

行行古道問仙蹤。驢背馱來睡眼矇。莫道仙緣非易結。仙鄉今在睡鄉中。

贈盧十二竹枝詞十二首次李小有韻

梅花破臘發瓊枝。乍轉東風淡蕩時。天上恰開王母宴。仙郎醉捧紫金卮。

其二

金谷春光爛錦絲。和風吹拂萬年枝。碧雲名謫青雲裏。玉液恩濃太液池。

其三

花枝濃淡映青陽。把酒輕浮琥珀光。願得年年春色爛。紅梅香遞九霞觴。
其四

輕煙晴日百年初。五色元芝產玉除。學得長生丹已熟。蓬萊何事覓仙書。
其五

瑞雲渺渺葛山巔。柳稜花柔豔雪天。太白謫來塵世裏。陽春一曲吐青蓮。
其六

瀟灑盧生意自如。樽前今日問何吁。想因素室傳書後。天半飛來素女無。
其七

何姑曾共汎螺舟。咫尺相思天際悠。恨殺青鸞無處覓。春風醉過岳陽樓。
其八

雲隔巫山十二峯。元霜獨酌醉思濃。莫愁應早歸金屋。織女何須七夕逢。
其九

章臺柳色應知改。回首青青可奈何。莫恨瑤臺無爾伴。雲中好去覓仙娥。
其十

西行怪道懶於雲。方朔原來爲細君。但得元珠生老蚌。何勞飛鳥渡河汾。

其十一

白玉仙童吹紫鸞。飛來次第落洛干。他年亂舞瓊筵上。贏得吳姬笑眼看。

其十二

不獻蟠桃唱竹枝。願君富壽更多兒。明春再祝長安道。同上紅樓續舊詞。

申端愍公詩集卷七

儀封十一景

請見遺踪

白樓城倚大河濶。塵拂元文問碣陰。石鼓尙留春樹老。朱琴已入暮雲深。明明一見開天眼。脈脈千年印道心。咫尺孔林天地闊。於今遺鐸未沈音。

景文故宅

長隄秋老雨蕭蕭。驚眼濤聲怒野橈。二妙風流存往樹。三春花柳問寒宵。殘碑明滅帆光遠。煙火霏微古木凋。安得渡人如渡蟻。平沙莫莫景文橋。

琉璃聖井

遠樹寒沙抱浚城。梁園東眺野林橫。百年不改封人邑。此地猶懸聖井名。苔篆拂題摹碧竅。泉心深底印泓清。輶軒到處低回意。仰止能無感慨情。

金花女營

千邨星散北河危。不謂元戎是俠姬。野樹風來驚壁壘。陳雲日下黯熊羆。綠林半解羣雄甲。繡閣高懸大將旗。落莫春煙兵氣在。而今巾幗愧鬚眉。

雋城曉月

行行東野杵煙疎。暮雨寒林踏古城。紫竹月流梁御苑。黃沙雲翳祖龍車。當年城郭煩憑弔。此地滄桑付
慨噓。紅蓼灘頭銜照遠。新豐雞犬問邨廬。

練苑春光

雨霽隳頭溼翠茵。遊人載酒踏輕塵。鶯花未老蘇隄曉。風月應憐杜曲春。帘影參差煙樹斷。帆光上下櫓
橋新。梵宮笙管高樓笛。此際君其問水濱。

大河飛汎

濤怒驚搖客子魂。吐吞星宿倒崑崙。賊心何處三江險。屈指從來四瀆尊。帆掛舳艫吹大壺。界懸南北控
東昏。憑欄樓畔頻搔首。欵乃歌聲撼禹門。

浣泥落雁

衰柳危樓碧水枯。晴沙極目踏平蕪。霜流曉月鷗依渚。雨漲汀洲雁宿蘆。蒼蒲茫茫迷遠棹。青帘落落問
邨沽。淒涼滿眼悲秋老。我欲重臨鄭俠圖。

青陵樵唱

花塢茆房枕大河。參差巒岫拂煙蘿。荒磷腐草英雄墓。白月芳溪牧子歌。景自輞川圖裏得。人從湖曲鏡
中過。踏春曾共山農語。笑指青青百畝禾。

黃渡漁歌

波心十里藕花居。澤國吟魂遠故閩。落日漁歌浮野笛。香風畫舫襲遊裾。滄桑一霎迷菱蕩。耕鑿三春問沮洳。緜綠滿疇茅草溼。最晴較雨卜公餘。

大關晨鐘

垂楊一滴雨花飛。浮碧流丹映曉暉。南國何年存古刹。西來此地悟禪機。開從天際迢迢出。鐘入林端脈脈微。苦殺衆生沈孽海。慈航乞佛早傳衣。

沙溝曉行

水涵霜枯欲曙天。前洲雲翳霜蘆邊。笠簔早踏畦間月。欵乃遙喧渡口船。一色鷗隨沙渚白。幾家犬吠野廚煙。風塵日夜憐牛馬。落落晨征亦澹然。

雍邱八景

辰樓春霽

崑嶠飛閣擁箕城。瑞靄浮光樹色清。四野煙花隨檻合。五陵風雨入杯平。琴聲要眇雙鳧落。鯨氣蒼茫一劍鳴。極目中原烽火盡。蕭蕭醞酒倚闌情。

雙塔秋風

野梵疎鐘貝華飄。蕭條暮雨咽秋濤。風流二妙青燈冷。突兀雙峯紫嶽高。渡蟻快君千古事。飛鳧笑我一

官勞。寒帷到處傳兵檄。寒袂生風落劍毛。

西崗挺翠

拄笏遙看萬樹煙。閒來聊一踏春田。隋隄疎柳迷荒隴。漢苑孤松峙遠天。邨塢離離兵火外。林岱歷歷野峯前。淒涼擬爲山民乞。欲減今年稅畝錢。

南溪流雲

春落黃河入檻流。晴雲冉冉問漁頭。山銜野渡孤城出。泉咽寒濤萬樹浮。樓櫓百年梁苑月。滄桑一霎石陵秋。茫茫滿目關河淚。孤艇何緣侈壯遊。

河橋官柳

樓堞驚看百雉成。春城十里板橋橫。長隄野綠吹風煖。曲水霞光泛雪晴。載酒空勞遊子屐。驅車常滌旅人纓。慚予腰折憐青眼。不盡依依道左情。

高陽晚渡

秋樹寒營掛薜蘿。山邨返照夕陽多。雁亭瑞靄高陽里。鶉火煙消瓠子河。山氣霏微涵蜺影。砧聲清切和漁歌。願將賊退談耕事。待我公餘踏月過。

圍城夜月

漠漠霜風野樹低。黃昏故國水瀾瀾。漁燈明滅霞光杳。月影參差暝色遲。古渡疎雲秦壁壘。荒臺秋艸漢

旌旗孤城烽火墟煙淨。夜坐猶聞鼓角悲。

空桑煙雨

聖里孤邨傍水潯。陰陰桑拓鬱蕭森。三家浪說耕莘事。千載誰知負鼎心。煙墅蒼茫吹夜杵。雨聲滴瀝應秋砧。星軺西去龍嵒色。乘興遙聽擊壤吟。

平千十一景

聰山來爽

古碑零落拂苔封。勒得聰明是此峯。映帶沙雲敷錦繡。參差葛麓簇芙蓉。花城縹緲開孤峙。野梵霏微疊數重。佳氣怪來何鬱鬱。太行一派卽真龍。

淦水流清

郭外行行五里程。西來一瀉自泓清。午橋虹照看垂影。春浦風輕羨濯纓。野鷺飛飛迴岸柳。遠帆泛泛聚波萍。魚磯猶傍中丞墓。滄海桑田感慨生。先伯中丞別墅在南濱。築釣臺以自適。今改成坐。而碑石尙存。

春城花柳

春城十里護沙隄。選勝無如花豔時。桃葉搖風吹碧浪。梨枝帶雨溼香泥。行行忘倦因苔癩。色色堪娛趁日遲。載酒莫辭芳草醉。陌頭柳絮漸飛絲。

秋浦蒹葭

菱荷天氣條難留。四野蘆花望欲愁。鶯帶霞痕飛紫岫。鴻拖霜色渡寒洲。幾聲瑟瑟添新漲。一色蒼蒼點素秋。數恨伊人疑宛在。扁舟只欲汎中流。

十里錦雲

花滿河陽在昔傳。環洛如錦自何年。四圍練白含香藥。一色霞明映碧蓮。步似潘妃疑未盡。湖名西子總爲偏。莫教露冷紅芳褪。好拂亭亭畫棹前。

千畦碧浪

最喜平干絕石田。淞陽曲曲碧飛濺。既來遍灑三春雨。穫處應題七月篇。雲覆金莖驚繡圃。風吹銀穗訝簾泉。家家啖雪爭翻匙。摩腹頻歌大有年。

水面樓臺

風流太守一高陽。領取春光代白霜。陳留劉際明以待御出守廣平。酷嗜詩酒。建樓臺於城北水面。亭榭四通聊問月。芙蕖十里卽留棠。浮雲偏戀漁磯冷。野水應嗤俗吏忙。遠眺盈盈狂欲渡。蓮船橫繫綠陰傍。

城闌花翠

望望邯鄲禾黍宮。分來城闕恨芳叢。香消此地秦樓月。歌隱當年趙國風。粉黛千秋羞競媚。驪黃一顧自羣空。相思脈脈須憐取。賸有芙蓉玉頰豐。

奎閣朝霞

誰移高閣赤城旁。東井文明峙一方。海日射來虹氣燦。岱雲飛去紫毫芒。每從星夜瞻奎斗。信有春風兆玉堂。北榭南樓聯畫棟。龔黃留得兩甘棠。關係郡守南二太建。

龍潭夜月

廣武何年百丈湫。至今猶共詫仙洲。傳來泓淼爲蛟室。幻出波濤卽海樓。村近數家孤廟寂。風生六月一天幽。如余空有深淵羨。誰解龍潛萬斛愁。

冉塋古蹟

素王俎豆榮千古。仰止斯人亦素侯。曾憶當年悲啓牖。卻聞此地弔遺邱。湯泉往事歸流水。洙泗餘光映月秋。燕趙諸豪迷葬處。紛紛空笑觸蝸牛。

毛塚高風

一劍橫階氣若何。平原食客盡消磨。銅盤熱血驚蠻楚。錐穎英魂壯滌河。碑自蒼蒼看獨峙。世多碌碌許誰過。幾迴憑弔先生墓。猶見虹光映碧蘿。

新泰八景

新甫擁翠

三峯盤鬱白雲深。月照離宮弔漢秦。仙蹟渺茫無處覓。荒臺薜綠幾經春。

汶水拖藍

汶上分流漾玉虹，盈盈迴繞具敖峯。問津知有鮫人室，河伯於今號護龍。

敖山削壁

振衣千仞氣凌秋，青魯彈丸一望收。爭說泰山雄四嶽，嵯峨應次溥靈侯。

龍池夜月

漁磯釣月一天幽，潭影空寒望欲愁。風雨驟噴孤廟寂，幻來應敕蜃爲樓。

發雲翠潤

空青欲滴映朱霞，選盡林巒興轉賒。到得春來霏白雪，猶疑罽衲散天花。

暴書古蹟

石留博古動欷歔，誰命山名姓字疎。料是竹溪沈醉客，狂來曾曬腹中書。

仙臺夕照

聯雲翠柏拂旌旗，海島煙茫望欲迷。空築高臺留晚照，山雲應笑武皇癡。

靈槐復榮

霜老孤根已謝春，琴堂依舊覆濃陰。東皇預洩鹽梅信，絲竹飛來夜半音。

申端愍公詩集卷八

詠史詩

歌南風

聖主垂裳干羽同。交明彈入五絃中。後來擊筑酣歌者。不是南風是大風。

桑林禱雨

祝網嘻吁三面開。精誠一念格天回。七年忽灑桑林雨。豈是區區禱得來。

鷓夷子皮

肯將名姓留塵世。笠澤浮雲碧海寬。一艇卻憐拋種去。英魂回首劍光寒。

鷄鳴狗盜

莫笑田文食客卑。秦關夜度亦堪奇。朱門養士知多少。急難何人救主危。

荆軻

蕭蕭易水悲歌日。欲報燕丹斃祖龍。博浪後來椎一擊。荆軻七首是前鋒。

焚書

詩書不結祖龍讎。卻恨無端一炬收。試問陰符焚也未。圮橋早已付留侯。

斬蛇

赤龍飛燕比唐虞。眞主如何無瑞符。揮劍芒山白帝死。斷蛇莫謂史臣誣。

漂母

風塵誰解識王孫。無怪千金報一飧。推食何如隆主遇。淮陰不負漢家恩。

虞美人

憑弔重瞳羨好迷。香魂青血映千秋。悲歌垓下憐殉項。羞殺彭城未死劉。

大風歌

猛士風雲帝祚長。再傳誰致漢幾亡。高皇計慮還疎淺。不守宮中守四方。

人哉

國本從來不可移。無端高帝欲偏私。只因怙寵胎人哉。不是憐姬是殺姬。

智囊

起釁無端削七王。忠謀未免亦疎狂。一籌未展歸東市。不解當年號智囊。

弄臣

高皇曾枕中官臥。文帝如何又效尤。朝罷傳來丞相檄。英風不下舞陽侯。

眞將軍

一令驚傳細柳軍，卻令天子尙逡巡。無人寄與條侯道，似此原非少主臣。
金錢媿心

文帝懲貪事若何，漢家廉節未全磨。後來墨吏誰知媿，若賜金錢費許多。
漢武帝

封禪東巡駕海航，覓仙欲保萬年長。雲沈五柞攀龍泣，始信山靈誑武皇。
蘇武

孤臣仗節操嶙峋，白髮歸來十九春。莫道漢家偏負德，芳名贏得殿麒麟。
問牛喘

漢尚刑名元氣索，開三大燬總堪憂。京師正爾驚冰雹，丞相如何只問牛。
昭君

倡議和親孰畫籌，琵琶千載恨悠悠。明妃莫怨毛延壽，建信原貽大漢羞。
折檻

炎鼎將移抱隱憂，小臣欲斬佞臣頭。當年折檻聲何壯，卻怪無言到五侯。
掛冠

火德煙微冠早掛，飄然浮海脫塵寰。校書天祿風波險，何似遼東客自閒。

冰合

司馬溲沱欲渡軍，詐傳冰合遂爲真。瑞符他日胎國讖，王霸原來是罪臣。
客星犯帝座

披裘垂釣富春灘，文叔無端欲授官。夢裏不知天子貴，仍將同學故人看。

圓橋冠帶

橋門輻輳辟離開，文物東都亦盛哉。共羨談經儒道重，誰教天竺覓書來。

埋輪

豺狼當道實堪虞，懷懷風裁獨抗書。跋扈後來誰復問，埋輪當日竟何如。

下榻

大木將顛孰可維，南州高士炳先幾。假令對榻親相語，仲舉如何未拂衣。

劉寵一錢

會稽太守亦賢哉，選數金錢伴騎回。今日好官多得處，卻非父老願齋來。

登龍門

矯矯聲名高俊及，澄清只欲砥狂瀾。卻愁登處龍門險，不似深林樹屋安。

月旦評

兩字奸雄定阿瞞。品題千載服高譚。莫推司馬知人者。冰鑑而今在汝南。
銅臭

西邸新開漢室傾。金錢百萬駕公卿。當年赫奕今何在。留得千秋一臭名。
臥龍

吳魏分爭漢室秋。長吟抱膝定奇謀。南陽假使龍終臥。西蜀誰延一綫劉。
分香賣履

奸僞阿瞞真似鬼。留連妻妾語喁喁。何如先主臨殂日。祇把遺雛屬臥龍。
荷鍤

笑傲乾坤付酒杯。竹林深處任徘徊。茫茫大地皆棺槨。醉死何須荷鍤埋。
鑽李

司徒共許晉名流。鑽核緣何又執籌。放達場中容若輩。六賢應爲竹林羞。
畢吏部

儀表百僚惟吏部。舉朝放達自誰開。風流醉盜鄰郎酒。畢卓當年是罪魁。
聞蝦蟆鳴

當日朝廷半爲私。君王到處轉生疑。華林莫笑蝦蟆問。司馬家兒未必癡。

聞雞起舞

回首銅駝感慨興。舞來劍氣逼寒星。江沱閒臥成何事。喔喔雞聲喚不醒。

運甓

神州回首已沈淪。未掃鯨鯢倍愴神。運甓齋頭憐獨瘁。流連江左是何人。

絕裾

天性生來目不磨。太真當日竟如何。後來雖灑登舟泣。回首高堂淚孰多。

咄咄書空

出處當年卜廢興。書空咄咄見真情。深源終肯辭徵辟。管葛如何有盛名。

圍棋賭墅

圍棋一局神閒澹。淝水秦兵自奪魂。不是八公風鶴助。山桑覆轍亦深源。

充隱

莫笑相元徵聘巧。世間真隱幾多逢。欲從箕穎尋巢許。山澤高人半是充。

捨身

佞佛捨身持戒業。無端候景帶兵來。臺城非復如同泰。畢竟羣臣贖不回。

女學士

臨春一曲後庭花，巾幗衣冠樂趣賒。腸斷景陽王氣散，卻憐學士屬誰家。

張麗華

誰似阿廢偏重色，如雲西苑倍臨春。麗華地下逢高類，應道亡隋自有人。

剪綵爲花

花敷宮院不如秋，曲曲清歌夜夜遊。安得阿廢頭顱穩，始知天子果無愁。

李密

兵破滎陽倡義初，誅秦滅項氣何如。桃林卻媿韓彭死，莫道當年讀漢書。

放宮女

粉黛含情實可哀，出宮相顧意還猜。晉陽侍寢人何處，曾否當年放得回。

置酒凌煙閣

樓殿凌煙酒半醺，笑看胡越一家春。琵琶彈處含悲咽，應爲尊前少二人。

縱囚

六辟從來難倖免，從囚赦死法何疎。文皇果有譚憐意，應似明王泣下車。

李貓

殘撲忠良如嚙鼠，柔奸恃寵亦何驕。六宮近日深相妬，誰使君王又畜貓。

北門學士

共參機務北門開，分寵南衙簡雋才。學士朝回頻待詔，問誰又引阿師來。

骨醉

玉輦迎來蓄髮尼，入宮只欲妬蛾眉。恣凶骨醉誰堪似，人斃而今又見之。

懷義

既已傾身娥媚娘，舉朝無術淨椒房。縱令如奏闈懷義，又恐宮中詔六郎。

請兄入此甕

酷吏從來法必除，恢恢天網莫言疎。早知懸甕輪回到，只合生平學杜徐。

蓮花似六郎

卻把名花比貌同，怪來乳臭亂春宮。一朝桃李連枝起，回首芙蓉恨落紅。

點籜

千年遺臭孰堪羞，和事君王浪點籜。產祿未除留禁幄，何如太尉竟安劉。

梨園子弟

紛紛絲管遶梨園，兵起漁陽法駕奔。莫笑歌聲隨夢散，海清凝碧解酬恩。

長枕大被

花萼樓頭燦錦茵。五王同醉禁宮春。太真宴罷停歌舞。院靜須防授笛人。
焚珠玉錦纈

珠玉綺羅列殿前。誰令一旦付煙殘。海南遣使俄傳詔。回首餘灰尙未寒。
伴食宰相

秉國應須心共濟。莫云懷慎是庸臣。妬賢林甫中書日。宰相誰爲伴食人。
伏獵侍郎

宰相奸邪致亂亡。羣僚進退任平章。中書旣已題鑿字。伏獵如何不侍郎。
三國夫人

香塵亂碾入宮門。三國平分大內恩。腸斷馬嵬飛腸香。花鈿委地泣芳魂。
洗兒

忍殺瑤琚忍殺瑛。賜錢非種博歡聲。馬嵬山驛羞難洗。卻恨癡兒弄父兵。
冰山

劍門冷落夕陽殘。奸相魂隨蜀道還。見峴閭誰堪共倚。嵩山回首笑冰山。
衣白山人

良娣凶淫國事非。懶拖朱紫日思歸。後來元載深相妬。翻笑山人未白衣。

失印

宰相從來量貴寬，晉公雅度更爲難。如何滅燭宮闈變，仍作尋常失印看。
擊毬狀元

幼主昏庸國步危，擊毬自許獨稱奇。黃巢兵入長安陷，何不臨戎一擊之。
歇後鄭五

羞作門生天子官，平章半載別金鑾。後來朱朴成何事，回首浮名笑謝安。
陳橋兵變

侍中代漢兵猶震，檢點移周事更奇。身上黃袍何處得，這番不用裂黃旗。
燭影搖紅

殿上驚看燭影紅，湘山疑錄欠分明。德昭廷美終何在，縱不謀兄亦恃兄。
一榜盡賜及第

一榜同沾及第榮，只因藝祖託英雄。德昭當日曾相屬，何不舍容使善終。
求遺書

魏國當年巧畫籌，君王無事不相謀。太平半部真堪佐，何用紛紛下詔求。
希夷先生

方外逍遙世外仙，華山一枕謝朝簪。太平天子頻相見，卻怪先生睡未酣。

賞花賦詩

瓦橋敗後儘堪憂，何事留連後苑遊。莫笑賦詩能退敵，太宗當日是貽謀。

引燭焚詔

聖相精忠氣薄雲，肯將聲色媚明君。祥符日捧天書詔，無復當時引燭焚。

此酒極佳

天書舉國共相欺，尊酒如何竟受貽。莫笑子明甘喪節，臨終尸諫嚼披緇。

三旨宰相

三旨如何獨得名，只因宰相善逢迎。無端詠檜排蘇軾，惟護飛龍是建明。

九尾狐

變相奸回賦性殊，紛紛獻媚說祥符。醜名莫笑彭年獨，當日逢迎半似狐。

杜門縱博

子明作相能容準，準亦能容不報丁。劍貯錦囊今在否，回頭應悔怨居停。

沽酒聽漁歌

醉倚漁磯唱棹歌，孤臣渡險任風波。沅湘不報三閭恨，自是清朝雨露多。

流代圖

直道當年在隘門。愁看新法敢昌言。孤臣自上英州道。萬里誰從叩九關。

安樂窩

卷舒只在一窩中。柳月梧風見道情。不是先生終不起。出門愁聽杜鵑聲。

金蓮送院

先帝憐才屬後裔。文章遭際此爲奇。元符貶謫無虛日。不念金蓮送院時。

立雪

二子當年見道高。雪中侍久不知勞。蔡京門外徵書至。卻恐龜山立未牢。

書生叩馬

十二金牌詔退軍。康王生怕返徽欽。妬功豈盡關長腳。畢竟書生見未深。

親操桴鼓

軍前桴鼓退金師。壯士何緣配俠姬。到得跨驢湖上醉。夫人端不愧西施。

跨驢攜酒

奸相當權抱隱憂。功成勇退是良謀。魏公已竄鄂王死。贏得西湖獨醉遊。

竹籬犬吠

學吠村莊不怕嘲。垂涎富貴媚權豪。玉津園下冰山盡。搖尾應從別處皞。
松壽

從來獻媚誰爲甚。宦念無如大諛濃。贏得太師恩愛好。半憐壽妾半憐松。
朱墨吏

孰云公道竟沈淪。信史傳來自有真。朱墨而今分黑白。回看擲筆是何人。
三烈

推排經界買公田。擾擾東南命不堪。莫道朝紳爭媚賈。當年烈士尙餘三。
鬪蟋蟀

笑擁紅粧葛嶺頭。平章日日恣歡遊。木絲菴下風光好。蕭索奸魂蟋蟀秋。
黃冠歸故里

自是先生死不難。歸山何故乞黃冠。傳來方外留侯訣。博浪沙中可報韓。
造龍舟

深宮夜永漏聲催。舞罷天魔內苑開。空造龍船驚百二。不曾渡得上都回。

三十年三月廿六日
設書店

編主五雲王

編初成集書叢

種一他其及吟氣浩

中華民國二十六年三月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

五三三三

美那



83
14
2285